

四庫全書

經部

欽定四庫全書

經部

周禮述註卷二十三

詳校官監察御史<sub>臣</sub>施朝翰

刑部郎中<sub>臣</sub>許兆椿覆勘

總校官進士<sub>臣</sub>朱鈐

校對官員外郎<sub>臣</sub>張慎和

謄錄監生<sub>臣</sub>王家賓

欽定四庫全書

周禮述註卷二十三

安溪李光坡撰

冬官攷工記第六

鄭目錄云象冬所立官也是官名司空者冬閉  
藏萬物天子立司空使掌邦事亦所以富立家  
使民無空者也司空之篇亡漢興購求千金不  
得此前世識其事者記錄以備大數古周禮六

篇畢矣 疏曰鄭義既然今案漢書藝文志云  
經禮三百威儀三千及周之衰諸侯將踰濫度  
惡其害已皆滅去其籍孔子時而多不具以此  
觀之冬官一篇其亡已久有人尊集舊典錄此  
三十工以為攷工記雖不知其人又不知作在  
何日要知在於秦前是以遭秦滅焚典籍韋氏  
裘氏等闕也 坡聞之兄曰尚書伯禹作司空  
而後契為司徒是唐虞之官也王制司空度地

居民而後司徒脩禮明教是夏殷之官也洪範  
四曰司空五曰司徒殷官又其著者帝王皆首  
司空而周公獨後之何蓋與易以艮成終成始  
義合也是故冢宰掌天司徒掌地兼總條貫是  
二官者包乎上下其外春夏秋冬各司一事宗  
伯以禮樂教而實由司空之富邦國生萬民而  
後教化行則自冬而春貞下起元之義也禮以  
節之樂以和之政以行之刑以防之極其效不

過欲老有所終幼有所長黎民不饑不寒矜寡  
孤獨廢疾者有養而已則春生夏長秋收以至  
冬藏之義也以此為終而實王道之始以此為  
始而要其成何以加茲深哉周公之意豈有異  
於堯舜禹湯之心乎 矜讀鰥

國有六職百工與居一焉

註曰百工司空事官之屬司空掌營城郭都邑立社  
稷宗廟造宮室車服器械監百工者唐虞已上曰共

工 疏曰六職即下云或坐而論道至治絲麻以成之是也

○或坐而論道或作而行之或審曲面勢以飭五材以辨民器或通四方之珍異以資之或飭力以長地財或治絲麻以成之

註曰言人德能事業之不同者也論道謂謀慮治國之政令也作起也辨猶具也資取也操也鄭司農云審曲面勢審察五材曲直方面形勢之宜以治之及

陰陽之面背是也春秋傳曰天生五材民竝用之謂金木水火土也玄謂此五材金木皮玉土

○坐而論道謂之王公

註曰天子諸侯

作而行之謂之士大夫

註曰親受其職居其官也

審曲面勢以飭五材以辨民器謂之百工

註曰五材各有工言百衆言之也



通四方之珍異以資之謂之商旅

註曰商旅販賣之客也易曰至日商旅不行

飭力以長地財謂之農夫

註曰三農受夫田也

疏曰飭勤也地財穀物皆是

治絲麻以成之謂之婦功

註曰布帛婦官之事

鄭敬仲日記之所載自王公

士大夫以至於農夫婦功皆有職於國者也而百工者事職之所主故列於事官而為之屬也然上無道揆

則下無濫守朝不信道則工不信度三公坐而論道則上有道揆而朝信道此道德之所以明也士大夫作而行之則下有濫守而工信度此風俗之所以同也先王之時所以同風俗者尤謹於百工以其衣服器械之所由出也然則其可不屬之以官乎 與音預長丁丈反執音勢監古銜反共音恭販甫萬反

粵無鑄燕無函秦無廬胡無弓車

註曰此四國者不置是工也鑄田器詩云猗乃錢鑄

又曰其鑄斯掇鄭司農云函讀如國君舍垢之舍函  
鎧也廬讀為廬謂矛戟柄胡今匈奴

○粵之無鑄也非無鑄也夫人而能為鑄也燕之無函  
也非無函也夫人而能為函也秦之無廬也非無廬也  
夫人而能為廬也胡之無弓車也非無弓車也夫人而  
能為弓車也

註曰言其丈夫人人皆能作是器不須國工粵地塗  
泥多草蕨而山出金錫鑄冶之業田器尤多燕近強

胡習作甲冑秦多細木善作矜秘匈奴無屋宅田獵  
畜牧逐水草而居皆知為弓車 粵越同鐫音博燕  
音烟廬魯吳反夫人註方無反沈音扶待直里反錢  
子淺反捫音趙鎧音愷鑪音盧箴音穢矜巨巾反秘  
音祕

知者創物

註曰謂始聞端造器物若世本作者是也

巧者述之守之世謂之工

註曰父子世以相教 知音智聞音開

百工之事皆聖人之作也

註曰事無非聖人所為也

鑠金以為刃凝土以為器作車以行陸作舟以行水此皆聖人之所作也

註曰凝堅也 坡謂此申知者創物事 鑠始灼反

天有時地有氣材有美工有巧合此四者然後可以為良

註曰時寒溫也氣剛柔也良善也

○材美工巧然而不良則不時不得地氣也

註曰不時不得天時 劉執中曰不言不得天時地

氣而曰則不時不得地氣者蓋東西南北之異宜在地之氣不均也而器遷乎其地而不能良者則於地之氣有得有不得之辨若天時春夏秋冬之行孰有不同之方歟其失之者非時不然也人也

○橘踰淮而北為枳鸛鵒不踰濟貉踰汶則死此地氣

然也

註曰鸛鵒鳥也春秋昭二十五年有鸛鵒來巢傳曰書所無也鄭司農云不踰濟無妨於中國有之貉或為猿謂善緣木之援也汶水在魯北

○鄭之刀宋之斤魯之削吳粵之劍遷乎其地而弗能為良地氣然也

註曰去此地而作之則不能使良也 疏曰若據經所言則鄭之刀以此刀之鐵移向宋而作斤宋之斤

移向鄭而作刀皆不得為良 鄭剛中曰言橘貉鸛  
鵠賦性以生者猶非其地則不能生况刀斤削劍之  
器出於人為者乎引彼喻此以見地氣之不可不順  
也

○燕之角荆之幹妨胡之筈吳粵之金錫此材之美者  
也

註曰荆荊州也幹柘也可以為弓弩之幹妨胡胡子  
之國在楚旁筈矢幹也禹貢荊州貢櫟幹柘及筈



籀楷

○天有時以生有時以殺草木有時以生有時以死石有時以泐水有時以凝有時以澤此天時也

註曰言百工之事當審其時也鄭司農云泐讀如再  
勑而後掛之勑泐謂石解散也夏時盛暑大熱則然  
坡謂此數節皆申巧者述之事審時得氣掄材惟  
巧者能之 枳諸氏反鵲其俱反鵠音欲濟子禮反  
貉音涸汶音問削思約反又思詔反姦音焚苛干上

聲泐音勒澤音亦猿音袁柘音蔗樛勅倫反菌其隕  
反籥音路楷音枯

凡攻木之工七攻金之工六攻皮之工五設色之工五  
刮摩之工五搏埴之工二

註曰攻猶治也搏之言拍也埴黏土也故書七為十  
刮作挽鄭司農云十當為七挽摩之工謂玉工也挽  
讀為刮其事亦是也毛氏曰凡此諸工以職多者  
上寡者次之尤寡者為下

○攻木之工輪輿弓廬匠車梓攻金之工築冶鳧鼎段桃攻皮之工函鮑鞞韋裘設色之工畫績鍾筐慌刮摩之工玉柳雕矢磬搏埴之工陶旒

註曰事官之屬六十此職其五材三十工畧記其事耳其曰某人者以其事名官也其曰某氏者官有世功若族有世業以氏名官者也廬矛戟矜秘也國語曰侏儒扶廬梓榎屬也鄭司農云鮑讀為鮑魚之鮑書或為鞆蒼頡篇有鞆鞆鞞讀為歷運之運慌讀為

芒芒禹迹之芒柳讀如巾柳之柳旒讀為甫始之甫  
玄謂旒讀如放於此乎之放 疏曰某人者若匠人  
梓人韞人鮑人之類此等直指事上名官曰某氏者  
義有二一者官有世功以官為氏若韋氏襄氏冶氏  
之類二者族有世業以氏名官若鳧氏臬氏之等  
坡謂此二節皆申守之世謂之工也 刮古八反搏  
音團埴時職反臬音栗韞音運續戶對反幌莫黃反  
柳音即旒音紡拍普百反黏女廉反挽音刮侏音朱

榘古馬反鞮匹學反斃如充反放甫罔反

有虞氏上陶夏后氏上匠殷人上梓周人上輿

註曰官各有所尊王者相變也舜至質貴陶器甗大  
瓦棺是也禹治洪水民降丘宅土卑宮室盡力乎溝  
洫而尊匠湯放桀疾禮樂之壞而尊梓武王誅紂疾  
上下失其服飾而尊輿

○故一器而工聚焉者車為多

註曰周所尚也 陳君舉曰車制用在輪故察車自

輪始輪之外輻為圍圍之中直指湊轂者為輻輻之所蓄而利轉者謂之轂轂裏之大穿謂之賢轂外之小穿謂之軹轂中空處謂之敷轂上橫通通載者謂之軸軸末以防輪而固謂之牽軸上橫伏而納輶者謂之輶輶上所載三面材謂之任正任正之上謂之軫軾前掩軾版謂之陰軾與深謂之隊植於輿兩傍謂之輶蔽風塵謂之第橫於兩輶而為人所憑者謂之式中式驂馬內轡處謂之輶式下之植從者謂之輶

兩轆之上出於式者謂之較較之下從者謂之軹以革鞅式以皮覆式謂之鞅以簞衣式謂之車軌納轡之環謂之鞅著車之衆環謂之指有曲轢而出從前稍曲而上謂之軹軹前持衡者謂之頸頸下衡者謂之衡衡下兩馬謂之服服外兩馬謂之驂兩服之四轡兩驂之四轡謂之八轡兩驂之內轡系於式其在手者外轡與服馬之四轡謂之六轡前系於衡後系於軹以防驂馬之入者謂之脅驅驂馬之系車四條謂

之鞞內兩條納於陰者謂之陰鞞外系於軸者謂之  
外鞞拘二鞞以絆其背者謂之鞞背為環以管外內  
轡謂之游環削革三就當胃謂之繁纓縷金以當盧  
謂之錫著鈴於兩鑣謂之驚置鈴於式謂之和兩駟  
內轡謂之勒車上之覆則有蓋蓋之斗謂之部蓋上  
撩謂之弓蓋之小柄謂之達常大扛長八尺謂之程  
此車之通制也 甌音武輶人九反輻音福轂音谷  
軸音逐輦音轄輶音舟輶音濮輶同輶音犯輶音倚



輓莫官反𨔵音對較音覺鞮音儀鞞羊音反鞞音顯  
錫音陽捺音聊扛虎項反程音汀

### 車有六等之數

註曰車有天地之象人在其中焉六等之數濂易之

### 三材六畫

○車軫四尺謂之一等戈秘六尺有六寸既建而迤崇  
於軫四尺謂之二等人長八尺崇於戈四尺謂之三等  
及長尋有四尺崇於人四尺謂之四等車戟常崇於及

四尺謂之五等酋矛常有四尺崇於戟四尺謂之六等  
註曰此所謂兵車也軫與後橫木崇高也八尺曰尋  
倍尋曰常父長丈二戈父戟矛皆挿車騎鄭司農云  
迤讀為倚移從風之移謂著戈於車邪倚也酋發聲  
直謂矛 楊謹仲曰此以軫為與後橫木後注以軫  
為與故學者惑焉軫正是與之名蓋四畔各以木加  
於輿上以閑其所載詩所謂伐收也其四方則象地  
故曰軫方象地惟四畔皆木也故論軫之高則以後

橫木為度六分其廣以一為軫圍車廣六尺六寸則是輿後橫木圍一尺一寸徑三寸三分寸之二輪六尺六寸故軹高三尺三寸并後軫與轆七寸其高四尺故指後橫木為高之度軫之義不止後橫木也

○車謂之六等之數

註曰申言數也 秘音秘迤以氏反父音殊酋在由反著丁略反邪似嗟反儼在演反

凡察車之道必自載於地者始也是故察車自輪始

註曰先視輪也自從也 坡謂凡車材皆載於輪上  
惟輪載於地

○凡察車之道欲其樸屬而微至不樸屬無以為完久  
也不微至無以為戚速也

註曰樸屬猶附著堅固貌也齊人有名疾為戚者春  
秋傳曰蓋以操之為已感矣速疾也微至謂輪至地  
者少言其圜甚著地者微耳著地者微則易轉故不  
微至無以為戚速 鄭剛中曰察車之道必觀乎輪

而觀輪之濫又自有術

○輪已崇則人不能登也輪已庠則於馬終古登阤也

註曰已大也甚也崇高也齊人之言終古猶言常也  
阤阤也輪庠則難引 毛氏曰輪樸屬而微至固盡  
善矣而高下又不可以無節

○故兵車之輪六尺有六寸田車之輪六尺有三寸乘  
車之輪六尺有六寸

註曰此以馬大小為節也兵車草路也田車木路也

乘車玉路金路象路也兵車乘車駕國馬田車駕田馬

○六尺有六寸之輪軹崇三尺有三寸也加軹與轅馬四尺也人長八尺登下以為節

註曰此車之高者也軹與也鄭司農云軹車也轅讀為旃僕之僕謂伏兔也玄謂軹轂末也此軹與轅并七寸田車又宜減焉乘車之軌廣取數於此軌廣八尺旁出與亦七寸也疏曰車與六尺有六寸軌廣

謂轍廣轍八尺則車輿外旁出與兩相各七寸七寸之數取於軫幘之數也 趙氏曰幘置於輪輻軸上如兩短柱以承軫者 屬章欲反戚音促庠音婢阨堂何反阪音反幘音卜惠音衛

○輪人為輪斬三材必以其時

註曰三材所以為轂輻牙也斬之以時材在陽則中冬斬之在陰則中夏斬之今世轂用雜榆輻以檀牙以檀也

○三材既具巧者和之

註曰調其鑿內而合之

○轂也者以為利轉也輻也者以為直指也牙也者以為固抱也

註曰利轉者轂以無有為用也鄭司農云牙讀如跛者訝跛之訝謂輪輹也世間或謂之罔書或作輹

○輪敝三材不失職謂之完

註曰敝盡而轂輻牙不動 牙音訝中音仲檀居良



反內同衲如銳反

望而眡其輪欲其悞爾而下也進而眡之欲其微至也無所取之取諸圜也

註曰輪謂牙也悞均致貌也進猶行也微至至地者少也非有他也圜使之然也 疏曰望而視之謂車停止時下迤者謂輻轂上轂下兩兩相當正直不旁迤 趙氏曰此段是分別察輪之節目據牙輻轂綆四者而言皆謂輪已成而眡其所作之善否非謂方

制輪之時上文以轂為先輻次之牙次之自內言之  
至於外也此以輪為先輻次之轂次之自外以及內  
也方其制輪則自內以及外及其既成而眡之則自  
外以及內事之序如此 𠵿音覓綆讀為餅音兩下  
同

望其輻欲其掣爾而纖也進而眡之欲其肉稱也無所  
取之取諸易直也

註曰掣纖殺小貌也肉稱弘殺好也鄭司農云掣讀

為紛容掣參之掣玄謂如桑螵蛸之蛸 疏曰凡輻  
皆向轂處大向牙處小言掣纖據牙處小而言也肉  
稱向轂為稱 掣音蕭又音朔稱尺證反易以豉反  
殺色界反參所林反螵眈昭反蛸音蕭

望其轂欲其眼也進而眡之欲其幬之廉也無所取之  
取諸急也

註曰眼出大貌也幬幔轂之革也革急則褰木廉隅  
見鄭司農云眼讀如限切之限 眼魚懇反幬音蹈

一音疇慢莫干反裏音果見賢遍反

眡其綆欲其蚤之正也

註曰蚤讀為爪謂輻入牙中者也鄭司農云綆讀為闕東言餅之餅謂輪筭也玄謂輪雖筭爪牙必正也

○察其菑蚤不齟則輪雖敝不匡

註曰菑謂輻入轂中者也菑與爪不相侔乃後輪敝盡不匡刺也鄭司農云菑讀如雜廁之廁謂建輻也泰山平原所樹立物為菑聲如哉博立臬基亦為菑

匡枉也

疏曰人之牙齒參差謂之齟 綆音餅蚤音

爪下同菑側吏反齟五構反箠薄歷反俛九委反刺  
洛葛反哉則吏反臬古堯反

# 凡斬穀之道必矩其陰陽

註曰矩謂刻識之也 疏曰此欲斬穀之時先就樹

刻之記識其向日為陽背日為陰之處必記之者為

後以火養其陰故也

○陽也者稹理而堅陰也者疏理而柔是故以火養其

陰而齊諸其陽則穀雖敝不歉

註曰稂致也火養其陰炙堅之也鄭司農云歉當作耗玄謂歉歉暴陰柔後必橈減憊革暴起疏曰言以火養炙陰柔之處使堅與陽齊等也

○穀小而長則柞大而短則摯

註曰鄭司農云柞讀為迫喈之喈謂輻間柞狹也摯讀為摯謂輻危摯也玄謂小而長則苗中弱大而短則穀末不堅

○是故六分其輪崇以其一為之牙圍

註曰六尺六寸之輪牙圍尺一寸

參分其牙圍而漆其二

註曰不漆其踐地者也漆者七寸三分寸之一不漆者三寸三分寸之二今牙厚一寸三分寸之二則內外面不漆者各一寸也

桴其漆內而中誣之以為之轂長以其長為之圍

註曰六尺六寸之輪漆內六尺四寸是為轂長三尺

二寸圍徑一尺三分寸之二也鄭司農云梓者度兩漆之內相距之尺寸也

○以其圍之防捎其數

註曰捎除也防三分之一也鄭司農云捎讀為桑嫫蛸之蛸數讀為蜂數之數謂轂空壺中也玄謂此數徑三寸九分寸之五壺中當輻菑者也蜂數者猶言趨也數者衆輻之所趨也疏曰車轂之灋其孔必大頭寬小頭狹當輻入處謂之數寬狹處中而已防



者三分之一也於前一尺三分寸之二三分取一以除空中當藪之處使容車轂也

○五分其轂之長去一以為賢去三以為軹

註曰鄭司農云賢大穿也軹小穿也玄謂此大穿徑八寸十五分寸之八小穿徑四寸十五分寸之四大穿甚大似誤矣大穿實五分轂長去二也去二則得六寸五分寸之二凡大小穿皆謂金也今大小穿金厚一寸則大穿穿內徑四寸五分寸之二小穿穿內

徑二寸十五分寸之四如是乃與數相稱也 疏曰

上經言穀空壺中此言穀大小兩頭

○容穀必直陳篆必正施膠必厚施筋必數幬必負幹

註曰鄭司農云讀容上屬曰軹容玄謂容者治穀為

之形容也篆穀約也幬負幹堵革穀相應無羸不足

趙氏曰穀約不專指軹而言蓋穀以革鞣之約謂

鞣也於鞣之上而飾以采色如巾車孤乘夏篆注亦

謂夏篆五采畫穀約也陳設其篆采之文則欲正而

不邪

○既摩革色青白謂之穀之善

註曰謂九漆之乾而以石摩平之革色青白善之微也 疏曰此謂以革鞣穀訖將漆之先以骨丸之待乾以石摩之色青白則善也 稹之忍反歆呼暴反

柞莊百反摯註讀絜魚列反詘止勿反防音勒梢音蕭藪素口反篆直轉反膠音交識音志耗呼報反暴步莫反橈乃孝反喈莊百反數色角反鞣莫官反乾

音干

參分其轂長二在外一在內以置其輻

註曰轂長三尺二寸者令輻廣三寸半則輻內九寸

半輻外一尺九寸

○凡輻量其鑿深以為輻廣

註曰廣深相應則固足相任也

輻廣而鑿淺則是以大抗雖有良工莫之能固

註曰抗搖動貌

鑿深而輻小則是固有餘而彊不足也

註曰言輻弱不勝轂之所任也 疏曰鑿深而輻小

者謂轂大故鑿得深

○故竝其輻廣以為之弱則雖有重任轂不折

註曰言力相稱也弱菑也今人謂蒲本在水中者為弱是其類也鄭司農云竝讀如絃綫之絃謂度之

疏曰力相稱者止謂輻廣與鑿深相稱蒲本在水為弱則此弱亦是輻入轂中者也

○參分其輻之長而殺其一則雖有深泥亦弗之濂也  
註曰殺衰小也鄭司農云濂讀為黏謂泥不黏着輻  
也 疏曰假令輻除入轂之中其外長三尺則殺一  
尺以向牙以本麤末細塗則向下利故泥不黏着之  
○參分其股圍去一以為骹圍

註曰謂殺輻之數也鄭司農云股謂近轂者也骹謂  
近牙者也方言股以喻其豐故言骹以喻其細人脰  
近足者細於股謂之骹羊脰細者亦謂骹 疏曰上

經云殺其一者據長短之中殺一分此經三分殺一  
據本麤末細而言

○揉輻必齊平沈必均

註曰揉謂以火槁之衆輻之直齊如一也平沈平漸  
也鄭司農云平沈謂浮之水上無輕重

直以指牙牙得則無槩而固

註曰得謂倨句鑿內相應也鄭司農云槩撥也蜀人  
言撥曰槩玄謂槩讀如涅從木熱省聲

不得則有槩必足見也

註曰必足見言槩大也然則雖得猶有槩但小耳

鄭剛中曰輻直而倨牙曲而句倨句之勢難乎相得  
苟輻之直而指牙牙與輻二者相入而各得其正雖  
無槩亦固也況於有槩乎槩楔也若夫倨戾各不相  
得雖有木以槩之其槩不隱必有時而見矣足見謂  
其槩之大也輻之入牙未必不用槩而能固者也但  
二者相得則有槩而小似無槩焉其勢亦固不相得



則有繫必大雖大亦不能固上云無繫而固非無也  
必其相得若無也 量音良抗五骨反深尸鳩反下  
同彊其良反竝獲耕反殺色界反謙註作黏女廉反  
駮胡飽反揉如九反繫魚列反見賢遍反紘音宏弱  
音弱羸音粗倨音據句古侯反鑿內如銳反擻素結  
反涅乃結反楔音屑俛音詭

六尺有六寸之輪綆參分寸之二謂之輪之固

註曰輪算則車行不掉也參分寸之二者出於輻股

鑿之數也

趙氏曰蓋凡造車必置綆於輻外一頭

入轂一頭入牙所以遮護撐住著輪使行時不至於搖扞也三分寸之二謂綆在輻外近轂處輻廣三寸半輻是側安者此處甚高必礙住綆綆不容與輻一般排鑿孔使兩頭俱入牙所以鑿轂與牙之時綆鑿孔向外侵三分寸之二疏雖只說鑿牙其實兼轂而言蓋綆那頭必入轂故也所謂三分寸之二者以一寸三分之而得其二也以數計之則綆離輻齒爪鑿

孔六分有奇如此則綆不被輻高處閣起又輔助住  
輻輻有倚靠則車行不掉輪自堅固所以謂之輪之  
固也據輪人為蓋疏云則向外謂近與處綆是安在  
輪之內面外面無有綆或謂綆兩頭俱入於牙不入  
於轂此說不然蓋輻中間高閣住綆綆如何俱入於  
牙得若使綆一頭不入於轂皆入於牙註當言出於  
輻散鑿數不當言輻股矣輻股是近轂處故也 綆  
方穎反掉徒弔反撐丑庚反

凡為輪行澤者欲杼行山者欲侔

註曰杼謂削薄其踐地者侔上下等

杼以行澤則是刀以割塗也是故塗不附

註曰附著也

侔以行山則是搏以行石也是故輪雖敝不甌於鑿

註曰搏園厚也鄭司農云不甌於鑿謂不動於鑿中

也玄謂甌亦敝也以輪之厚石雖齧之不能敝其鑿

旁使之動

○凡揉牙外不廉而內不挫旁不腫謂之用火之善

註曰廉絕也挫折也腫癰也 疏曰古者車輞屈一

木為之凡屈木多外廉絕理內挫折中旁腫負起無

此三疾是用火之善也 杼直呂反搏音團瓶音各

挫作臥反癰胡罪反輞音罔

是故規之以眡其園也

註曰輪中規則園矣

萬之以眡其匡也

註曰等為萬萋以運輪上輪中萬萋則不匡刺也萬  
鄭司農云書或作矩 趙氏曰輪圓物也中規則可  
如何欲其中矩蓋以規合之固可驗其不員處以矩  
合之其四方四角有不員處亦可因矩以驗之  
縣之以眡其輻之直也

註曰輪輻三十上下相直從旁以繩縣之中繩則鑿  
正輻直矣

水之以眡其平沈之均也

註曰平漸其輪無輕重則斲材均矣 疏曰兩輪俱

置水中

量其數以黍以眡其同也

註曰黍滑而齊以量兩壺無贏不足則同 疏曰謂

兩輪俱用黍量眡其容受同不

權之以眡其輕重之侔也

註曰侔等也稱兩輪鈞石同則等矣輪有輕重則引

之有難易

○故可規可萬可水可縣可量可權也謂之國工

註曰國之名工 易彥祥曰此又總括輪人一篇之

意大抵注目而視方員不如付諸規矩之為公謗口

而議平直不如付諸準繩之為審援手而度多寡輕

重不如付諸權量之為當六者設則天下之為方員

平直多寡輕重者皆不能外是固不容加毫末於其

間也 萬姜禹反縣音懸姜良主反

○輪人為蓋



疏曰輪輻三十蓋弓二十有八器類相似故因遣輪  
人造蓋

### 達常圍三寸

註曰圍三寸徑一寸也鄭司農云達常蓋斗柄下入  
杠中也王光遠曰蓋之制上為部中為達常下為  
程旁為弓達常小於程程小於部故非部無以納弓  
於其旁非程無以含達常於其中

### ○程圍倍之六寸

註曰圍六寸徑二寸足以含達常鄭司農云程蓋杠也讀如丹桓宮楹之楹

○信其程圍以為部廣部廣六寸

註曰廣謂徑也鄭司農云部蓋斗也 疏曰此言蓋之斗四面鑿孔內蓋弓者

○部長二尺

註曰謂斗柄達常也 疏曰此部即達常以此達常上入部中遂名此達常為部其實是達常也

○程長倍之四尺者二

註曰杠長八尺謂達常以下也加達常二尺則蓋高一丈立乘也 程讀楹音盈信音申廣古曠反杠音江

十分寸之一謂之枚

註曰為下起數也枚一分故書十與上二合為二十字杜子春云當為四尺者二十分寸之一

○部尊一枚

註曰尊高也蓋斗上隆高高一分也

○弓鑿廣四枚鑿上二枚鑿下四枚

註曰弓蓋橑也廣大也是為部厚一寸

○鑿深二寸有半下直二枚鑿端一枚

註曰鑿深對為五寸是以不傷達常也 疏曰此經

說蓋斗之上鑿孔內弓二十八孔之上下廣狹之義

趙氏曰下直二枚者上云鑿下四枚今於內畔於

下亦四枚與外正平故經謂之下直上云鑿上二枚

今於內畔孔低二分鑿上亦四枚故經謂之二枚下  
直鑿之下二枚鑿之上此一句指兩事而言也鑿端  
一枚者謂部高一寸今鑿上鑿下俱四枚其中只有  
二枚在以二枚之中取一枚鑿深放尖故云鑿端一  
枚端謂鑿頭也所以如此以弓外畔上下方正大四  
枚今於弓入鑿內處平刻其弓下畔二分於弓尖處  
又削去一分以納入鑿中使與鑿孔恰好相應如此  
則弓向處頭仰卻以蓋弓三分之近部一分揉放低

外二分為宇曲又以衣裳之則弓雖低而其力常健  
雖曲不至一向低斜此皆仰其弓故如此若俯其弓  
則弓自部以下皆低而蔽目矣先儒言鑿上二枚鑿  
下四枚指鑿之外也下直二枚指鑿之內也鑿廣而  
內狹上低而下正先高而揉之使下弓本仰而覆之  
使俯斯言盡之矣 鑿才報反櫟音老

弓長六尺謂之庇軹五尺謂之庇輪四尺謂之庇軫

註曰庇覆也杜子春云謂覆幹也玄謂軹轂末也與

廣六尺六寸兩轂并六尺四寸旁減軌內七寸則兩  
軹之廣凡丈一尺六寸也六尺之弓倍之加部廣凡  
丈二尺六寸有字曲之減可覆軹不及幹 疏曰上  
云以其轂長二在外一在內以置其輻輻內九寸半  
綆三分寸之二金轄之間三分寸之一輻又三寸半  
總尺四寸以此計之以七寸承輿七寸為軌凡減一  
尺四寸則兩軹之廣才丈一尺六寸也 庀筆肆反

幹音管

參分弓長而揉其一

註曰參分之持長撓短短者近部而平長者為宇曲也六尺之弓近部二尺四尺為宇曲疏曰撓而曲之謂之揉必撓近部二尺者以其本鑿弓孔時外畔弓上二枚弓下四枚內畔上下俱四枚由弓頭仰故須近部撓之使平向下四尺持之為宇曲吐水也

○參分其股圍去一以為蚤圍

註曰蚤當為爪以弓鑿之廣為股圍則寸六分也爪



圍一寸十五分寸之一 疏曰此言弓近蓋斗麤近  
末頭細之意

### 參分弓長以其一為之尊

註曰尊高也六尺之弓上近部平者二尺爪末下於  
部二尺二尺為句四尺為弦求其股股十二除之面  
三尺幾半也 鄭剛中曰前云部尊一枚言部之高  
耳若弓之入部則三分其長以其一為之尊假如六  
尺之弓則以二尺近部為高也

○上欲尊而宇欲卑

註曰上近部平者也隕下曰宇

上尊而宇卑則吐水疾而雷遠

註曰蓋者主為雨設也來車無蓋禮所謂潦車謂蓋

車與 雷力又反隕大回反

蓋已崇則難為門也蓋已卑是蔽目也是故蓋崇十尺

註曰十尺其中正也蓋十尺宇二尺而人長八尺卑

於此蔽人目 鄭剛中曰車出入乎門蓋太高則門

不能容人立乘乎車蓋太卑則目無所見古人制蓋之濶欲無害于門欲不蔽乎目故以十尺為度

○良蓋弗冒弗紘殷畝而馳不隊謂之國工

註曰隊落也善蓋者以橫馳於壟上無衣若無紘而弓不落也 坡謂弗紘謂有衣而弗係以組也 紘

戶耕反殷音隱隊直類反

○輿人為車輪崇車廣衡長參如一謂之參稱

註曰稱猶等也車輿也衡亦長容兩服 疏曰參如

一者謂俱六尺六寸也驂馬別有轡鬲引車故衡唯容服馬也 稱尺證反轡古侯反鬲同軛於革反

參分車廣去一以為隧

註曰兵車之隧四尺四寸鄭司農云隧謂車輿深也讀如鑽燧改火之燧玄謂讀如邃宇之邃 疏曰隧謂車輿之縱

○參分其隧一在前二在後以揉其式

註曰兵車之式深尺四寸三分寸之二 薛士龍曰植

於車與兩旁為轎橫於兩轎在車前為人所憑者為式

○以其廣之半為之式崇

註曰兵車之式高三尺三寸

○以其隧之半為之較崇

註曰較兩轎上出式者兵車自較而下凡五尺五寸

疏曰較謂車與兩相今人謂之平鬲也言兩轎謂車相兩旁豎之者二者既別而云鬲者以其較之兩頭

皆置于轎上二木相附故據兩轎出式言之

○六分其廣以一為之軫圍

註曰軫與後橫者也兵車之軾圍尺一寸

○參分軾圍去一以為式圍

註曰兵車之式圍七寸三分寸之一

○參分式圍去一以為較圍

註曰兵車之較圍四寸九分寸之八 毛氏曰轎植

乎輿之四隅較式附焉而不言其圍者舉較則轎可

知

○參分較圍去一以為軹圍

註曰兵車之軹圍三寸二十七分寸之七軹轎之植者衡者也與轂末同名 疏曰此軹是車較下豎直者及較下衡者竝縱橫相貫也

○參分軹圍去一以為鞬圍

註曰兵車之鞬圍二寸八十一分寸之十四鞬式之植者衡者也鞬者以其鄉人為名 疏曰此鞬形狀

一與前經軋同但在式木之下對人為言耳 隧音  
遂註隧遂同較古學反轉音對輶音倚鄉許亮反  
圜者中規方者中矩立者中縣衡者中水直者如生焉  
繼者如附焉

註曰治材居材如此乃善也如生如木從地生如附  
如附枝之弘殺也 中丁丈反縣音懸殺色界反  
凡居材大與小無并大倚小則摧引之則絕

疏曰上言居材得所此言不得所之事并偏邪相就



也倚則并也凡居材當各自用力若使大材倚并小材小材強不堪大材所倚則摧折若小并於大大木振其小木力不堪則斷絕也

### 棧車欲弇

註曰為其無革鞮不堅易圻壞也士乘棧車疏曰無革鞮與易可圻壞故當弇向內為之

### 飾車欲侈

註曰飾車謂革鞮與也大夫以上革鞮與疏曰侈

謂向外侈也 棧才產反弇於驗反鞅莫干反易以  
豉反圻勅白反

○輶人為輶

註曰輶車輶也詩云五檠梁輶 疏曰於三十工無  
輶人之官但車事是難故車官別主此職也

○輶有三度軸有三理

註曰目下車度淺深之數 易彥祥曰軸以貫轂特  
輪之一器於輶人何與而言於三度之後者軸待輶

而後運軻待軸而後行其勢實相資焉 軻張留反

檠音木

# 國馬之軻深四尺有七寸

註曰國馬謂種馬戎馬齊馬道馬高八尺兵車乘車軻崇三尺有三寸加軻與轡七寸又并此軻深則衡高八尺七寸也除馬之高則餘七寸為衡頸之間也鄭司農云深四尺七寸謂轅曲中 薛士龍曰軻之形自從軻前梢曲而上至衡下其頸以持衡其曲如

屋之梁馬

○田馬之輶深四尺

註曰田車輶崇三尺一寸半并此輶深而七尺一寸半今田馬七尺衡頸之間亦七寸則軫與轅五寸半則衡高七尺七寸

○駕馬之輶深三尺有三寸

註曰輪輶與軾轅大小之減率寸半也則駕馬之車輶崇三尺加軾與轅四寸又并此輶深則衡高六尺

七寸也今駕馬六尺除馬之高則衡頸之間亦七寸

率音律

軸有三理一者以為嫩也

註曰無節目也

二者以為久也

註曰堅刃也

三者以為利也

註曰滑密 嫩音美

軌前十尺而策半之

註曰謂輶軌以前之長也策御者之策也十或作七合七為弦四尺七寸為鈎以求其股股則短矣七非也鄭司農云軌謂式前也書或作軹玄謂軌是軌灋也謂與下三面之材輶式之所樹持車正也疏曰

軌謂車式式前十尺謂輶曲中而策半之則五策矣趙氏曰據下文軌中有濶則與上置隧處乃是軌正在隧之下式之前蓋輶身長一丈四尺四寸八與

隧下隧以前只有十尺以此見軌即隧之下面隧外  
空著一分輿軌即是閣住隧版之木橫子謂之軌者  
取其在下持住車有為則為灋之意 軌音犯注軌  
音同灋子肖反

# 凡任木

註曰目車持任之材

任正者十分其輶之長以其一為之圍衛任者五分其  
長以其一為之圍小於度謂之無任

註曰任正者謂輿下三面材持車正者也輶軌前十尺與隧四尺四寸凡丈四尺四寸則任正之圍尺四寸五分寸之二衡任者謂兩輶之間也兵車乘車衡圍一尺三寸五分寸之一無任言不勝其任 疏曰名任正者此木任力車輿所取正以其兩輶之所樹於此木較式依於兩輶故曰任正也衡任謂兩輶之間當輶頸之處費力之所者也 輶於革反勝音升五分其軫間以其一為之軸圍



註曰軸圍亦一尺三寸五分寸之一與衡任相應

疏曰軫間即與廣與衡長俱六尺六寸

十分其軾之長以其一為之當兔之圍

註曰軾當伏兔者也亦圍尺四寸五分寸之二與任正者相應 疏曰當兔謂與下當橫軸之處

○參分其兔圍去一以為頸圍

註曰頸前持衡者圍九寸十五分寸之九 趙氏曰

疏云衡在軾頸之下其頸於前向下持制衡鬲之轅

觀向下二字知軻過頸處又低下去禮書亦云軻從軻前微曲而上至衡則向下勾之

○五分其頸圍去一以為踵圍

註曰踵後承軻者也圍七寸七十五分寸之五十一  
凡揉軻欲其孫而無弧深

註曰孫順理也弧木弓也凡弓引之中參中參深之極也揉軻之偃句如二可也如三則深傷其力 疏曰揉者以火揉使曲也揉之欲使順理無得如弓之深弓

之深太曲也

○今夫大車之轅摯其登又難既克其登其覆車也必易此無故惟轅直且無橈也

註曰大車牛車也摯輶也登上阪也克能也疏曰

牛車自在下車人今於此說大車者輶人造輶主為

四馬車轅因說駕牛者亦須曲橈之意王光遠曰

摯言其至謂其勢直而下至也

○是故大車平地既節軒摯之任及其登阨不伏其轅

必縊其牛此無故惟轅直且無橈也

註曰陀阪也

王光遠曰軒言其高而上干摯言其

輕而下至既節軒摯之任則高下適中而無上干下至之患坡謂登陀之時轅直而柔則牛挽而下之必伏其轅轅堅牛挽之不下則組急而縊牛頸以意度之自見

○故登陀者倍任者也猶能以登及其下陀也不援其卽必縊其牛後此無故惟轅直且無橈也

註曰倍任用力倍也 王光遠曰由此觀之則轅雖不可以過曲亦不可以不曲此輶之三度所以其深皆有常數也 坡謂援拔也 邸大車後也下阨之時苟轅直無橈牛行急則必拔車後而覆之牛行緩則必緇絆牛後亦能覆車度之亦見 孫音遜弧音胡覆芳服反易以豉反橈音鬧邸丁禮反緇音秋縊於計反輶音周輕音智

是故輶欲頌典

註曰頤典堅刃貌鄭司農云頤讀為懇典讀為殄駟車之轅率尺所一縛懇典似謂此也 疏曰此已下

還說駟馬車轅

○輶深則折淺則負

註曰揉之太深傷其力馬倚之則折也揉之淺則馬善負之

○輶注則利準利準則久和則安

註曰故書準作水鄭司農云注則利水謂輶脊上雨

注令水去利也玄謂利水重讀似非也注則利謂輶  
之揉者形如注星則利也準則久謂輶之在與下者  
平如準則能久也和則安注與準者和人乘之則安  
坡謂注星張星也

○輶欲弧而無折經而無絕

註曰揉輶太深則折也經亦謂順理也

進則與馬謀退則與人謀

註曰言進退之易與人馬之意相應馬行主於進人

則有當退時 王光遠曰馬所以駕車車之進則以馬行為主故進則與馬謀人所以馭馬車之退則以人馭為主故退則與人謀

終日馳騁左不捷

註曰杜子春云捷讀為蹇左面不便馬苦蹇輒調善則馬不蹇也書捷或作券玄謂券今倦字也輒和則久馳騁載在左者不罷倦尊者在左

行數千里馬不契需



註曰鄭司農云契讀為爰契我龜之契需讀為畏需之需謂不傷蹄不需道里

終歲御衣衽不敝

註曰衽謂裳也

此唯軺之和也

註曰和則安是以然也謂進則與馬謀而下毛氏

曰終日馳騁一日之事也行數千里一月之事也終歲御一歲之事也一日之間左可捷而不捷一月之

間馬可病而不病一歲之間衣可敝而不敝豈非輶  
之和而然歟上曰和則安所謂安者非特君子安來  
而已馬與御者皆安馬是之謂安

○勸登馬力

註曰登上也輶和勸馬用力

馬力既竭輶猶能一取焉

註曰馬止輶尚能一前取道喻易進 願苦狠反典

音殄 棧音倦 契苦結反 罷音皮

良輶環漚自伏兔不至軌七寸軌中有漚謂之國輶

註曰伏兔至軌蓋如式深兵車乘車式深尺四寸三分寸之二漚下至軌七寸則是半有漚也輶有筋膠之被用力均者則漚遠鄭司農云漚讀為漚酒之漚環漚謂漆沂鄂如環疏曰自伏兔不至軌七寸者是從內向外之言更云軌中有漚則七寸外軌內乃有漚漚子肖反一音在學反沂魚巾反

軫之方也以象地也蓋之圜也以象天也輪輻三十以

象日月也蓋弓二十有八以象星也

註曰輪象日月者以其運行也日月三十日而合宿  
龍旂九旂以象大火也

註曰交龍為旂諸侯之所建也大火蒼龍宿之心其  
屬有尾尾九星 疏曰自此以下為上造車車上皆  
建旌旂故因說旂旗之義也然此以下九旂七旂六  
旂四旂之旌旗皆謂天子自建非謂臣下知者以此  
九七六四不與臣下命相當故也若臣下則皆依命

數然天子以十二為節而今有九七六四者蓋謂上得兼下也

○鳥旗七旂以象鶉火也

註曰鳥隼為旗州里之所建鶉火朱鳥宿之柳其屬有星星七星

○熊旗六旂以象伐也

註曰熊虎為旗師都之所建伐屬白虎宿與參連體而六星

○龜蛇四旂以象營室也

註曰龜蛇為旐縣鄙之所建營室玄武宿與東壁連體而四星陳用之曰旂以交龍所以寓其仁旗以鳥隼所以寓其禮而其數以九以七者為其主陽也旗以熊虎所以寓其義旐以龜蛇所以寓其智而其數以六以四者為其主陰也

○弧旌枉矢以象弧也

註曰覲禮曰侯氏載龍旂弧韜則星旗之屬皆有弧

也弧以張縵之幅有衣謂之韞又為設矢象弧星有  
矢也妖星有枉矢者蛇行有尾因此云枉矢蓋畫之  
劉執中曰龍旂以下皆所以象德也有德必有威  
故繼之以弧旌枉矢以象弧也 旂音留伐扶廢反  
宿音秀韞音獨縵所銜反

攻金之工築氏執下齊冶氏執上齊鳧氏為聲臬氏為  
量段氏為鑄器桃氏為刃

註曰多錫為下齊大刀削殺矢鑒燧也少錫為上齊

鍾鼎斧斤戈戟也聲鍾錙于之屬量豆區鬴也鑄器  
田器錢鑄之屬刃大刀刀劍之屬疏曰下齊上齊  
據下文六等言之四分已上為上齊三分已下為下  
齊若然鳧氏入上齊桃氏入下齊其臬氏段氏亦當  
入上齊中齊才細反段丁亂反錙音淳區烏侯反  
鬴音輔錢子淺反

# 金有六齊

註曰目和金之品數



六分其金而錫居一謂之鍾鼎之齊五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之大刀之齊五分其金而錫居二謂之削殺矢之齊金錫半謂之鑒燧之齊

註曰鑒燧取水火於日月之器也鑒亦鏡也凡金多錫則忍白且明也 鄭剛中曰攻金之工獨無為鼎

為斧斤為鑒燧之工鼎亦鍾之屬可附於鳧氏之官斧斤亦上齊可附於戈戟之列鑒燧獨無所可附意

者自有鑒燧之工執中齊記者亡之爾 忍柔忍之

忍今作勒

○築氏為削長尺博寸合六而成規

註曰今之書刀 疏曰漢時蔡倫造紙秦蒙恬造筆

古者未有紙筆則以削刻字至漢雖有紙筆仍有書  
刀是古之遺瀦也若然則經削反張為之若弓之反  
張以合九合七合五成規也

欲新而無窮

註曰謂其利也鄭司農云常如新無窮已

敝盡而無惡

註曰鄭司農云謂鋒鏑俱盡不偏索也玄謂刃也脊也其金如一雖至敝盡無瑕惡也

○冶氏為殺矢刃長寸圍寸鋌十之重三垸

註曰殺矢與戈戟異齊而同其工似補脫誤在此也殺矢用諸田獵之矢也鋌讀如麥秀鋌之鋌鄭司農云鋌箭足入橐中者也垸量名讀為丸坡謂為殺

矢四句當屬上築氏敝盡無惡之下錯簡在此耳蓋  
削殺矢皆下齊而築氏之所執觀上序可見矣 鋌  
徒頂反琬音丸

戈廣二寸內倍之胡三之援四之

註曰戈今句子戟也或謂之鷄鳴或謂之擁頸內謂  
胡以內接柲者也長四寸胡六寸援八寸鄭司農云  
援直刃也胡其子 趙氏曰戈戟皆刺兵也戈二刃  
戟三刃戈小而戟大戟兵器之最健者其別於戈以

此內謂胡下接秘處正是鐵筒子入木柄者這裏面  
謂之內胡謂矛之旁出者援謂自秘直至上尖頭刺  
刃也戈廣二寸總內與援與胡言三者皆徑廣二寸  
內倍之其長四寸胡三之其長六寸援四之其長八  
寸

○已倨則不入已句則不決長內則折前短內則不疾  
註曰戈句兵也主於胡也已倨謂胡微直而邪多也  
以啄人則不入已句謂胡曲多也以啄人則創不決

胡之曲直鋒本必橫而取圜於磬折前謂援也內長則援短援短則曲於磬折曲於磬折則引之與胡竝鉤內短則援長援長則倨於磬折倨於磬折則引之不疾 疏曰已倨謂胡頭大舒已句謂胡大橫也胡子橫捷微邪向上不倨不句似磬之折殺也內四寸援八寸竝有定數若胡內長則胡向上侵援援無八寸則短矣短則胡向上近援胡頭低則胡曲於磬折也胡既與援近故援共胡竝鉤竝鉤則援折故云折

前也胡內本四寸今胡近下為之胡下無四寸則上  
援長踰八寸矣胡近下安之則頭舒則胡倨於磬折  
也以頭舒故引之不疾

○是故倨句外博

註曰博廣也倨之外胡之裏也句之外胡之表也廣  
其本以除四病而使用也俗謂之曼胡似此 疏曰

倨謂胡上句謂胡下倨與句皆有外廣倨之外胡之  
裏謂胡下近本增使廣句之外胡之表謂於胡上近

本增之使廣若然則胡本上下俱寬自然合於磬折  
無上四疾而使用矣

○重三錡

註曰鄭司農云錡量名也讀為刷玄謂許叔重說文  
解字云錡鍰也今東萊稱或以大半兩為鈞十鈞為  
環環重六兩大半兩鍰錡似同矣則三錡為一斤四  
兩援音袁句古侯反錡色劣反子音結秘音秘鍰  
戶關反



戟廣寸有半寸內三之胡四之援五之倨句中矩與刺重三鈚

註曰戟今三鋒戟也內長四寸半胡長六寸援長七寸半三鋒者胡直中矩言正方也鄭司農云刺謂援也玄謂刺者著柶直前如鑄者也戟胡橫貫之胡中矩則援之外句磬折與疏曰刺謂於援胡之橫上中使出者也但長短無文蓋與胡同六寸乃可克三鈚之數也胡六寸橫貫三寸直下三寸是胡中矩也

援七寸半亦以三寸為橫稍舉之使不中矩以四寸半者向上為磬折磬折向外故云外勾 中丁仲反刺七賜反鐫祖悶反

○桃氏為劍臘廣二寸有寸半

註曰臘謂兩刃

○兩從半之

註曰鄭司農云謂劍脊兩面殺趨鐫 趙氏曰半之

自脊分斷一邊廣一寸四分寸之一

○以其臘廣為之莖圍長倍之

鄭剛中曰莖者劍鐔也柄謂之夾莖者人所把握之處在夾之中如竹木之莖然故名曰莖長倍之則長五寸

○中其莖設其後

註曰鄭司農云中謂穿之也玄謂從中以卻稍大之也後大則於把易制

○參分其臘廣去一以為首廣而圍之

註曰首圍其徑一寸三分寸之二 疏曰此首廣謂劍把接刃處之徑也圍之謂圍之故廬人皆以圍為圍之也 臘力闔反莖戶耕反鐔音尋一音徒南反把音霸

身長五其莖長重九鈐謂之上制上士服之身長四其莖長重七鈐謂之中制中士服之身長三其莖長重五鈐謂之下制下士服之

註曰上制長三尺重三斤十二兩中制長二尺五寸

重二斤十四兩三分兩之二下制長二尺重二斤一兩三分兩之一此今之匕首也人各以其形貌大小帶之此士謂國勇力之士能用五兵者也樂記曰武王克商裨冕搢笏而虎賁之士說劍說吐活反

○鳧氏為鍾

陳用之曰鳧氏為鍾而記序言為聲者蓋凡為樂器以十二聲為之齊量而十二聲皆主於鍾故也

○兩樂謂之銑

註曰銑鍾口兩角 疏曰古之樂器應律之鍾狀如  
今之鈴不圓故有兩角

○銑間謂之于于上謂之鼓鼓上謂之鉦鉦上謂之舞  
註曰此四名者鍾體也鄭司農云于鍾脣之上祛也  
鼓所擊處 鄭剛中曰鍾口兩間名于謂之祛者以  
鍾脣厚褰祛然

○舞上謂之甬甬上謂之衡

註曰此二名者鍾柄

○鍾縣謂之旋旋蟲謂之幹

註曰旋屬鍾柄所以縣之也鄭司農云旋蟲者旋以蟲為飾也玄謂今時旋有蹲熊盤龍辟邪

○鍾帶謂之篆篆間謂之枚枚謂之景

註曰帶所以介其名也介在于鼓鉦舞甬衡之間凡四鄭司農云枚鍾乳也玄謂今時鍾乳俠鼓與舞每處有九面三十六疏曰舉漢瀛一帶九古瀛亦當然鍾有兩面面皆三十六也

○于上之攏謂之隧

註曰攏所擊之處攏弊也隧在鼓中窒而生光有似夫隧 樂力端反銑先典反鉦音征甬音勇篆直轉反攏音靡隧音遂祛止書反褰音愆蹲音存辟邪獸名上音僻下似嗟反俠同夾窒於蛙反

十分其銑去二以為鉦以其鉦為之銑間去二分以為之鼓間以其鼓間為之舞脩去二分以為舞廣

註曰此言鉦之徑居銑徑之八而銑間與鉦之徑相



應鼓間又居銑徑之六與舞脩相應舞脩舞徑也舞  
上下促以橫為脩從為廣舞廣四分今亦去徑之二  
分以為之間則舞間之方恒居銑之四也舞間方四  
則鼓間六亦其方也鼓六鉦六舞四此鍾口十者其  
長十六也鍾之大數以律為度廣長與圓徑假設之  
耳其鑄之則各隨鍾之制為長短大小也凡言間者  
亦為從篆以介之鉦間亦當六今時鍾或無鉦間  
坡謂鍾有三層銑與鼓同一層鉦一層舞一層假如

銑徑一尺去二分以為銑間因於銑間內去二分以  
為鼓間此一層也鉦徑八分去二分以為鉦間此二  
層也舞徑六分去二分以為舞廣三層也鍾弁上侈  
下分數如此註自明矣

○以其鉦之長為之甬長

註曰并衡數也

○以其甬長為之圍參分其圍去一以為衡圍

註曰衡居甬上又小疏曰以自兩轅已上至甬

皆下寬上狹衡又在甬上故宜小一分

○參分其甬長二在上一下以設其旋

註曰令衡居一分則參分旋亦二在上一下以旋  
當甬之中央是其正 從子容反

薄厚之所震動清濁之所由出侈弇之所由興有說

註曰說猶意也故書侈作移鄭司農云當為侈 坡  
謂上詳鍾之形制此則言其器已成則厚薄清濁弇  
侈之聲皆生於此蓋泛言聲出於器非言其病也有

說二字宜連下文為句

○鍾已厚則石

註曰大厚則聲不發

○已薄則播

註曰大薄則聲散

○侈則柞

註曰柞讀為咋咋然之咋聲大外也

○弇則鬱

註曰聲不舒揚

○長甬則震

註曰鍾掉則聲不正 疏曰典同云薄聲甄甄猶掉也掉者據鍾形薄此不據鍾體據甬長縣之不得所則鍾掉故聲不正也 坡謂此乃言其病也蓋大鍾宜厚小宜薄鍾上宜狹下宜寬厚薄侈弇所不可無者但過則為病不言清濁者不外於此也 柞側百反註柞同大音太下同大鍾如字

是故大鍾十分其鼓間以其一為之厚小鍾十分其鉦間以其一為之厚

註曰言若此則不石不播也鼓鉦之間同方六而今宜異又十分之一猶大厚皆非也若言鼓外鉦外則近之鼓外二鉦外一坡謂鼓與鉦同間鼓間即鉦間也鉦間八鉦間六則大小鍾之厚薄異矣此言欲去其病當厚薄中濶也

鍾大而短則其聲疾而短聞

註曰淺則躁躁易竭也

○鍾小而長則其聲舒而遠聞

註曰深則安安難息 坡謂此言欲去其病當長短中度也不言其制者上文自銑至衡長短詳矣故惟言不合者以為戒

為遂六分其厚以其一為之深而圜之

註曰厚鍾厚深謂室之也其室圜

○卓氏為量改煎金錫則不耗

註曰消涑之精不復減也。桌古文或作歷，玄謂量當與鍾鼎同齊。工異者大器。鄭剛中曰：改煎者煎而又煎也。

○不耗然後權之

註曰：權謂稱分之也。雖異澹用金必齊。疏曰：澹謂模。

○權之然後準之

註曰：準擊平正之。又當齊大小。鄭剛中曰：準是準。



其金錫六分金一分錫準其多少也準平也知其輕重又欲平其多寡

○準之然後量之

註曰鑄之於澶中也量讀如量人之量 疏曰此量謂既準訖量金汁以入模中鑄作之時也 為量音亮註謂量同餘量之及註量人等竝音良凍音練同齊才計反餘如字

量之以為補深尺內方尺而圜其外其實一補

註曰以其容為之名也四升曰豆四豆曰區四區曰  
鬴六斗四升也鬴十則鍾方尺積千寸於今粟米  
濇少二升八十一分升之二十二其數必容鬴此言  
內方耳圍其外者謂之脣 蔡氏曰案周鬴容六斗

四升實一千二百八十龠計一百三萬六千八百分  
為一千三十六寸八分嘗考漢斛容十斗實二千龠  
計一百六十二萬分為一千六百二十寸蓋方尺圍  
其外庇旁九釐五毫故累百六十二寸深尺積一千

六百二十寸今攷周家八寸十寸皆為尺范蜀公曰  
周黼方尺者八寸之尺深尺者十寸之尺方八寸圓  
其外廐其旁則畧一百三寸六分八釐深十寸則積  
一千三十六寸八分與漢斛同濶無疑也鄭氏云方  
尺積千寸又云圓其外者謂之脣二說皆非是方鄭  
之世漢斛尚在豈偶不及見與抑鄭氏以為周黼之  
制異於漢斛與

○其醫一寸其實一豆

註曰醫謂覆之其底深一寸也

○其耳三寸其實一升

註曰耳在旁可舉也

○重一鈞

註曰重三十斤

○其聲中黃鍾之宮

註曰應律之首 疏曰不直言中黃鍾之聲而云之

宮者子上有宮商角徵羽五聲具今之所中者中其

宮聲不中商角之等故以宮言之也

○槩而不稅

註曰鄭司農云令百姓得以量而不租稅 疏曰此  
官量鎮在市司所以勘當諸廛之量器以取平非是  
尋常所用故不稅 醫徒門反中丁丈反槩古愛反  
區烏侯反龠音藥庀音桃羃莫狄反覆方服反

其銘曰時文思索允臻其極

註曰銘刻之也時是也允信也臻至也極中也言是

文德之君思求可以為民立凜者而作此量信至於道之中

嘉量既成以觀四國

註曰以觀示四方便倣象之

永啓厥後茲器維則

註曰永長也厥其也茲此也又長啓道其子孫使凜則此器長用之  
索所白反觀古玩反啓道音導

凡鑄金之狀

註曰杜子春云狀謂鑄金之形狀

金與錫黑濁之氣竭黃白次之黃白之氣竭青白次之青白之氣竭青氣次之然後可鑄也

註曰消凍金錫精麤之候 疏曰此鑄冶所候烟氣

以知生熟之節

○段氏闕

○函人為甲犀甲七屬兕甲六屬合甲五屬

註曰屬讀如灌注之注謂上旅下旅札續之數也革

堅者札長鄭司農云合甲削革裏肉但取其表合以  
為甲 疏曰一葉為一札上旅之中續札七節六節  
五節下旅之中亦有此節

○犀甲壽百年兕甲壽二百年合甲壽三百年

註曰革堅者又支久 屬音注

凡為甲必先為容

註曰服者之形容也鄭司農云容謂象式 疏曰凡

造衣甲須稱形大小長短而為之



然後制革

註曰裁制札之廣袤

權其上旅與其下旅而重若一

註曰鄭司農云上旅謂要以上下旅謂要以下疏

曰謂札葉為旅者以札衆多故言旅旅即衆也

○以其長為之圍

註曰圍謂札要廣厚疏曰此據一札之上先量上

下之長乃以長中央圍之一市如此則長短廣狹相

稱也 要於遙反帀音決

凡甲鍛不摯則不堅已敝則橈

註曰鄭司農云鍛鍛革也摯謂質也鍛革大孰則革  
敝無強曲橈也玄謂摯之言致 疏曰摯謂孰之至  
極也鍛丁亂反摯音至大音太

凡察革之道眡其鑽空欲其窻也

註曰鄭司農云窻小孔貌窻讀為宛彼北林之宛

○眡其裏欲其易也

鄭剛中曰易者治之精而無敗藏也與孟子百畝不易之易同

○眡其朕欲其直也

註曰鄭司農云朕謂革制 坡謂線縫處曰朕

○橐之欲其約也

註曰鄭司農云謂卷置橐中也春秋傳曰橐甲而見于南 疏曰橐甲衣 趙氏曰此是革鍛至軟熟故卷時甚少如此革密緻而能周革內更無少生硬之

處故下文曰周也

○舉而眡之欲其豐也

註曰豐大

○衣之欲其無斷也

註曰鄭司農云斷謂如齒斷 疏曰人之齒斷前卻  
不齊札葉參差與之相似故以斷為喻

○眡其鑽空而窻則革堅也眡其裏而易則材更也眡  
其朕而直則制善也橐之而約則周也舉之而豐則明

也衣之無斷則變也

註曰周密致也明有光耀鄭司農云更善也變隨人身便利鄭剛中曰材不更則裏不易裏之易則知其材之累更鍛治也又曰朕之直者必其裁制之盡善鑽作官反空音孔窓於阮反易以豉反朕直忍反縈音羔衣於阮反斷戶界反更音庚硬額去聲

鮑人之事

註曰鮑故書或作鞮鄭司農云蒼頡篇有鞮鞹

○望而眴之欲其茶白也

註曰韋革遠眴之當如茅莠之色

○進而握之欲其柔而滑也

註曰謂親手煩潤之

○卷而搏之欲其無弛也

註曰鄭司農云卷讀為可卷而懷之卷搏讀為縛一

如璵之縛謂卷縛韋革也弛讀為既見而弛之之弛

無弛謂革不韞

○眠其著欲其淺也

註曰韋革調善者鋪著之雖厚如薄然

○察其線欲其藏也

註曰線杜子春云謂縫革之縷 鄭剛中曰革若堅

縮則受縷也必沒而不露其線若藏則革之堅縮可

知 荼音徒搏直轉反註縛同著直略反鞞匹學反

莞人充反攔人專反瑱他見反麟音奎線思賤反

革欲其荼白而疾澣之則堅

註曰鄭司農云韋革不欲久居水中 趙氏曰此革

既欲荼白又欲柔滑則知不為甲明矣又甲用生皮  
鮑人乃熟皮鮑人之革諒是為裏轂矢箠韞舄之類  
要柔白皮方可用韋氏卻是工於穿縛皮條為韋升  
等物

○欲其柔滑而腥脂之則需

註曰故書需作割鄭司農云腥讀如沾涯之涯割讀  
為柔需之需謂厚脂之韋革柔需



○引而信之欲其直也信之而直則取材正也信之而枉則是一方緩一方急也若苟一方緩一方急則及其用之也必自其急者先裂若苟自急者先裂則是以博為棧也

註曰鄭司農云棧讀為翦謂以廣為狹也 鄭剛中

曰革體既博一方先裂不可棄也必裁去其裂者而用其不裂者則壞廣為狹也故曰以博為棧 毛氏曰引而信之以下數句當在卷而搏之之下脫誤在

此

○卷而搏之而不迫則厚薄序也

註曰序舒也謂其革均也

○眡其著而淺則革信也

註曰信無縮緩

○察其線而藏則雖敝不甌

註曰鄭司農云甌讀為磨而不磷之磷謂韋革縫縷

沒藏於韋革中則雖敝縷不傷也 潁戶管反脛於

角反註渥同需人充反信音申棧音踐鞞音必鳥音  
昔劑而髓反甌音各

○鞞人為臯陶

註曰鄭司農云鞞書或為鞞臯陶鼓木也玄謂鞞者  
以臯陶名官也鞞則陶字從革

長六尺有六寸左右端廣六寸中尺厚三寸

註曰版中廣頭狹為穹隆也鄭司農云謂鼓木一判  
者其兩端廣六寸而其中中央廣尺也如此乃得有腹

○穹者三之一

註曰鄭司農云穹讀為志無空邪之空謂鼓木腹穹隆者居鼓三之一也玄謂穹讀如穹蒼之穹穹隆者居鼓面三分之一則其鼓四尺者版穹一尺三寸三分寸之一也倍之為二尺六寸三分寸之二加鼓四尺穹之徑六尺六寸三分寸之二也此鼓合二十版

○上三正

註曰鄭司農云謂兩頭一平中央一平也玄謂三讀

為參正直也參直者穹上一直兩端又直各居二尺  
二寸不弧曲也此鼓兩面以六鼓差之賈侍中云晉  
鼓大而短近晉鼓也以晉鼓鼓金奏 鞀音運陶徒  
刀反穹區邕反上三之三七南反鞀音陶

鼓長八尺鼓四尺中圍加三之一謂之鼗鼓

註曰中圍加三之一者加於面之圍以三分之一也  
面四尺其圍十二尺加以三分一四尺則中圍十六  
尺徑五尺三寸三分寸之一也今亦合二十版則版

穹六寸三分寸之二耳大鼓謂之鼗以鼗鼓鼓軍事  
鄭司農云鼓四尺謂革所蒙者廣四尺 疏曰中圓  
加三之一與上穹三之一者異彼據一相之穹加面  
三之一故兩相加二尺六寸三分寸二此則於面四  
尺總加三分之一則總一尺三寸三分寸一此穹隆  
少校晉鼓之半也版穹六寸三分寸二者亦據一相  
而言 鼗扶云反

為臯鼓長尋有四尺鼓四尺倨句磬折

註曰以臯鼓鼓役事磬折中曲之不參正也中圍與  
鼗鼓同以磬折為異 疏曰磬折者麤處近上不得  
參正也 陳用之曰鼓之名多矣此所記者二而已  
蓋此一篇或言其鼓之制或言其鼓木之制或舉中  
圍以見上下使後人可觸類而長之然則雷鼓靈鼓  
之大鼗鼓鼗鼓之小皆可知矣

凡冒鼓必以啓蟄之日

註曰啓蟄孟春之中也蟄蟲始聞雷聲而動鼓所取

象也冒蒙鼓以革

良鼓瑕如積環

鄭剛中曰瑕者漆之文理也冒鼓之革苟調而急則漆之也其瑕如累積玉環然

鼓大而短則其聲疾而短聞鼓小而長則其聲舒而遠聞

○韋氏

闕

趙氏說見鮑人



○裘氏闕

易彥祥曰裘氏篇亡亦不可攷然天官掌皮為大裘以至良裘功裘此經復有裘氏亦猶春官有典瑞此經復有玉人或者裘氏掌其制而掌皮言其用

○畫績之事雜五色

陳用之曰畫為之畫而已績為之會五采焉 鄭剛中曰色別有六獨言五色者自其辨而言之則玄淺而黑深故六自其體而言之初不甚相遠也故特以

雜五色言焉 畫胡卦反續胡對反

東方謂之青南方謂之赤西方謂之白北方謂之黑天  
謂之玄地謂之黃青與白相次也赤與黑相次也玄與  
黃相次也

註曰此言畫續六色所象及布采之次第續以為衣  
疏曰青與白相次以下論續於衣為對方之續也

易彥祥曰相次非次序之謂亦雜比以為設色之美  
而已

青與赤謂之文赤與白謂之章白與黑謂之黼黑與青謂之黻五采備謂之繡

註曰此言刺繡采所用繡以為裳疏曰此一經皆比方為繡次凡繡亦須畫乃刺之故畫繡二工共其職也易彥祥曰書言六章之裳宗彝藻火粉米黼黻絺繡言藻而繼之以火青與赤之文也言火而繼之以粉米赤與白之章也言粉米而繼之以黼白與黑之黼也言黼而繼之以黻黑與青之黻也惟黃之色無

所見而宗彝繡以虎雉則亦以黃為色茲實五采備之證 雉音詠

土以黃其象方天時變

註曰古人之象無天地也為此記者見時有之耳子家駒曰天子偁天意亦是也鄭司農云天時變謂畫天隨四時也

火以圜

註曰鄭司農云為圜形如火也玄謂形如半環然在

裳

山以章

註曰章讀為獐獐山物也在衣齊人謂麋為獐 趙氏曰章是山之草木星辰天之章草木地之章畫山雖有形須畫出草木之文而成章

水以龍

註曰龍水物在衣

鳥獸蛇

註曰所謂華蟲也在衣蟲之毛鱗有文采者 疏曰  
言華者象章華言蟲者是有生之總號言鳥以其有  
翼言獸以其有毛言蛇以其有鱗以首似驚亦謂之  
驚冕也

雜四時五色之位以章之謂之巧

註曰章明也績繡皆用五采鮮明之是為巧 獐音  
章麋俱倫反驚必列反

凡畫績之事後素功

註曰素白采也後布之為其易漬汙也不言繡繡以絲也鄭司農說以論語曰績事後素

○鍾氏染羽以朱湛丹秫三月而熾之

註曰鄭司農云湛漬也丹秫赤粟玄謂湛讀如漸車帷裳之漸熾炊也羽所以飾旌旗及王后之車

○淳而漬之

註曰淳沃也以炊下湯沃其熾烝之以漬羽漬猶染也

○三八為纁五入為緹七入為緇

註曰染纁者三八而成又再染以黑則為緹緹今禮俗文作爵言如爵頭色也又復再染以黑乃成緇矣鄭司農云以論語曰君子不以紺緹飾又曰緇衣羔裘爾雅曰一染謂之緹再染謂之纁三染謂之纁詩云緇衣之宜兮玄謂此同色耳染布帛者染人掌之凡玄色者在緹緇之間其六入者與鄭剛中曰設色之工五畫績鍾筐幌今以天官染人攷之春暴練



者其慌氏歟夏纁玄者其鍾氏歟若夫染夏雖不見於考工而經有五采備之文不然其筐人之職乎

湛子潛反秫音述淳章均反纁許云反緞側留反纁音茜窺音顙

○筐人

闕

○慌氏漣絲以浼水漚其絲七日去地尺暴之

註曰浼水以灰所漚水也漚漸也楚人曰漚齊人曰淪

○晝暴諸日夜宿諸井七日七夜是謂水凍

註曰宿諸井縣井中

慌音芒凍音練沉書銳反漚

烏豆反暴步卜反沛子禮反淩烏禾反縣音懸

凍帛以欄為灰渥淳其帛實諸澤器淫之以蜃

註曰渥讀如鄙人渥管之渥以欄木之灰漸釋其帛

也杜子春云淫當為涅書亦或為湛鄭司農云澤器

謂滑澤之器蜃謂灰也士冠禮曰素積白屨以魁拊

之說曰魁蛤也周官亦有白盛之蜃蜃蛤也玄謂淫

薄粉之令帛白蛤今海旁有焉 趙氏曰淳沃也渥

漬之使厚也 毛氏曰以欄為灰變生而熟以蜃為

灰變質而白 坡謂欄似礫礫似白槿而細華黃

○清其灰而盡之而揮之

註曰清澄也於灰澄而出盡晞之晞而揮去其蜃

○而沃之而盡之而塗之而宿之

註曰更渥渥之 王光遠曰塗之塗以蜃灰宿經宿

○明日沃而盡之

註曰朝更沃至夕盥之又更沃至旦盥之亦七日如  
漚絲也

○書暴諸日夜宿諸井七日七夜是謂水漚

欄音練一音蘭漚與漚同烏豆反盥音鹿拊方于

反蛤古盥反晞音希

周禮述註卷二十三